

# **AWIG-AWIG DESA PAKRAMAN PELIATAN**



## **DESA PELIATAN KECAMATAN UBUD KABUPATEN GIANYAR**

## MURDHA CITTA

Om Swastyastu, Om Awighnamastu Nama Siddham

Malarapan panghyanghning Ida Sang Hyang Widhi Wasa, asung kerta nugraha ngawentenang kahuripan skala niskala, ring Bhuwana Agung lan Bhuwana Alit. Manut dresta desane wantah pawakan pasayuban Krama Desa rawuhing kulawarga pawongannya. Desane kamanggehang Bhuwana Agung, pawongannya sowang-sowang pinaka Bhuwana Alit.

Sotaning Bhuwana Agung desane wantah pawakan Bhawa maurip jangkep saha Tri Hita Karana, luwire:

ha. Parhyangan, sahananing kahyangan, panyiwian desa genah ngarcana Ida Hyang Parama Wisesa, maka jiwana desane.

na. pawongan, krama saha warga desa maka sami pawakan Bayu Pramana (Tri Kaya) mawinan desane sida molah maprawerti.

ca. palemahan, tanah kakuwuban desa, sinanggeh stula sariraning desane.

Adung patemon bhuwana kalih, larapan santa jagadhita, sinanggeh murdhaning prayojana pangriptaning Awin-awing Desa Pakraman ring sabha krama Desa Pakraman Peliatan.

Pamutus sabha inucap pinaka sepat siku-siku pamatut, wastu prasida prayojanan mami kabeh prasama angidep muwah amagehaken kadi linging Awig-awig iki.

**PRATHAMAS SARGAH**  
**ARAN LAN WAWIDANGAN DESA**  
**Pawos 1**

- (1) Desa Adat puniki mawasta Desa Adat Peliatan
- (2) Jebar kakuwub wawidangannya mawastes nyatur desa:
  - ha. Sisih Wetan Desa Adat Teges Kanginan;
  - na. Sisih Kulon Desa Adat Padangtegal, Ubud;
  - ca. Sisih Lor Desa Adat Petulu;
  - ra. Sisih Kidul Desa Adat Mas.
- (3) Desa puniki kawangun antuk karang ayahan desa miwah karang guna kaya tur kepah dados 12 banjar, luwire:
  - ha. Banjar Yangloni
  - na. Banjar Teges Kawan
  - ca. Banjar Kalah
  - ra. Banjar Tengah Kangin
  - ka. Banjar Tengah Kauh
  - da. Banjar Teruna
  - ta. Banjar Pande
  - sa. Banjar Ambengan
  - wa. Banjar Tebesaya
  - la. Banjar Taman Kelod
  - ma. Banjar Padang Tegal Tengah
  - ga. Banjar Taman Sari

**DWITYAS SARGAH**  
**PATITIS LAN PAMIKUKUH**

**Pawos 2**

Desa Adat Peliatan Ngamanggehang pamikukuh minakadi:

- ha. Pancasila
- na. Undang-Undang Dasar Tahun 1945
- ca. paswara sang mawang rat nganinin indik Desa Adat
- ra. Tri Hita Karana manut sadacara Agama Hindu

**Pawos 3**

Luwir patitis Desa Adat Peliatan:

- ha. Mikukuhin miwah ngrajegang Sang Hyang Agama
- na. Nginggilang tata prawertine magama
- ca. Ngrajegang kasukertan Desa saha pawongannya sakala lawan niskala

**TRITYAS SARGAH**  
**SUKERTA TATA PAKRAMAN**

**Paket 1**

**Indik Krama**

**Pawos 4**

- (1) Sane kabaos Krama desa inggih punika kulawarga sane magama Hindu saha ngemong karang desa, ngemong karang guna kaya, jenek mapaumahan.
- (2) Sajaba punika sinanggeh tamyu sane kabinayang dados kalih inggih punika sane magama Hindu miwah siosan ring magama Hindu.
- (3) Indik tamyu punika, manut pararem.

**Pawos 5**

Krama Desa Wenten 4 (petang) pawos, luwire:

ha. Krama Ngarep, kulawarga sane ngamong karang.

na. Krama Pangempian, kulawarga sane tan ngamong karang desa, sakewanten sampun mawiwaha, kabaos Krama Banjar Patus.

ca. Krama Balu, kulawarga sane katinggal seda olih lanang utawi istrinnyane utawi sangkaning nyapihan.

Krama Balu inucap kabinayang dados:

- 1) Balu makrambian, inggih punika balu sane madue santana dereng marabian utawi dereng antes ngayah.
  - 2) Balu ngalisting, inggih punika balu sane tanpa Santana.
- ra. Krama Tapukan, kulawarga manut aksara ha ring ajeng, lan durung mawiwaha sakewanten durung antes ngayah (durung mayusa 19 warsa), utawi kantun masekolah malarapan ilikita pastika saking sekolahnya, manut pararem.

**Pawos 6**

Panamayan tedun makrama Desa:

ha. Ngawit jenek mapaumahan sangkaning ngamong karang manut pararem.

na. ngawit pawiwahan nyabran Ngembak Geni.

### **Pawos 7**

Sahanan Krama Desa sami keni tetegenan (ayah-ayah), luwire:

- ha. Ayah ngarep, mapiteges urunan miwah ayahan mamungkul saking krama ngarep.
- na. Ayah Ngempi, mapiteges ayahan mamungkul miwah urunan saparo saking Krama Ngarep.
- ca. Ayah Balu, ayahan miwah urunannya manut kawentenan balu inucap.
- ra. Ayah Tapukan , keni urunan mamungkul, ayahan luput.
- ka. Krama Kapukan Pengempian, krama balu pangempian duda kaundul olih krama ngarep.
- da. Prade rikalaning ngayah wenten sinalih tunggil krama matilar tan pasadok ring Prajuru sadereng puput karya, wenang krama inucap keni pamidanda manut pararem, tanjek laler kawastinin.

### **Pawos 8**

Swadharman Krama, sewosan ring tetegenan, luwire:

- ha. Tinut saturut ring sadaging Awig-awig, pararem lan paswaran Desa;
- na. Tan maren ngutsahayang mangda Desane Mrasidhayang nyujur manut patitis;
- ca. Tinut saturut ring Guru Wisesa.

### **Pawos 9**

Swadharman Tamyu luwire:

- ha. Tinut saturut ring yasa kertin desane;
- na. Tan piwal ring sadaging Awig-awig, pararem lan paswaran Desa;
- ca. nyadokang raga ring prajuru arahina sasampun jumenek malarapan antuk ilikita pastika saking desane utawi sang ngawawenang.
- ra. Yan tan tinut pacang kairid (tan kadadosang jumenek ring Desa).

### **Pawos 10**

Pioli-oli Krama:

- ha. Polih pasayuban sakala niskala tur kabawosin saha katiwakin pamutus sahanan wicarannya;
- na. Yarengin paruman tur wenang sareng mastikayang pamutus;
- ca. Kadadosang madeg Prajuru manut pararem.

### **Pawos 11**

Krama Desa kadadosang:

ha. Mapowangkit utawi tan tedun:

- 1) Rikala mapawangunan ngerabin, mayadnya, nandur (mamulih), sungkan, matepetin, kaluasan, malarapan antuk pasadok, manut pararem.
- 2) Kengin weneng wantah apisan, sajawaning wenten kalugra olih Prajuru.
- 3) Pasikian ayah ngempi inggih punika kulawarga sane sampun pada alaki rabi nanging tan ngawrediang utawi pianak, sampun mayusa 60 warsa tur tan meras sentana.

na. Nyada, mapiteges mademang ayah, risampun mayusa 70 warsa, tur tan dados nyuksukin.

Sang nyada mangda digelis sajeronin awarsa nyantenang penyeledihi.

ca. Nyade/nyuksukin sane kawenangang risampun manggeh daha taruna (19 warsa) utawi sampun mawiwaha tur mrasidayang nganutin krama.

ra. Nutug ayah antuk artha brana saantukan kapialang utawi ngentos ayah-ayah antuk artha brana manut paetangan sowang-sowang Banjar duaning kajudi olih sang mawang rat, kabawos naub.

## **Pawos 12**

Wusan dados Krama Desa luwire:

ha. Sangkaning:

- 1) Pinunas ngraga, kesah ka dura desa utawi nglangkungin segara.
- 2) Kanorayang, duaning sampun tan prasida ngesehin solah maprawerti satata lempas ring Awig-awig.
- 3) Wusan makrama banjar mapiteges wusan makrama desa, mangda sampunang kasinanggeh empak nglanting.

na. Sane wusan makrama:

- 1) Patut ngaturang karang ayahan ka Desa, prade karang punika Karang Desa.
- 2) Tan polih pah-pahan saking padruwean Desa Utawi Banjar.
- 3) Tan polih pasayuban sajeroning ala ayu.
- 4) Sang wusan makrama Desa/Banjar prade mawali malih patut naur saurah-arit tetegenan krama, manut pararem.

ca. Sang wusan sangkaning kanorayang prade mawali malih patut:

- 1) Muntasang sakaluir pamidanda utawi tetegenan sane ngranayang karonayang.
- 2) Nunas geng pengampura ring paruman Desa/Banjar maduluran panyangaskara panyapsap kaiwangan duaning nguak pasubaya pecak.

## **Palet 2**

### **Indik Prajuru Desa lan Dulun Desa (Panglingsir)**

#### **Pawos 13**

- (1) Desa Pakraman Peliatan kaenter olih Bendesa Pakraman
- (2) Banjar kaenter olih Klian Banjar
- (3) Bendesa dan Klian Banjar patut:

ha. Mawiwit saking krama wed kajangkeping antuk:

- 1) Uning ngwacen/nyurat aksara Latin utawi Bali.
- 2) Uning ring tata titining mawa desa.
- 3) Uning ring parindikan agama lan dresta.
- 4) Lascarya ngayah tur maduwe parilaksana sane rahayu.

na. Kaadegan malarapan antuk kajudi olih kramannya sowang-sowang nyabran 5 (limang) warsa, sajawaning wenten parindikan tiyos tur dados kajudi malih.

ca. Maduluran Dewa Saksi ring Bale Agung.

#### **Pawos 14**

- (1) Bendesa Pakraman kaabih olih:

ha. Pangliman pinaka Pamadennyane

na. Panyarikan pinaka juru surat.

ca. Patengen pinaka pangamong druwen desa.

ra. Patajuh pinaka pawantu.

- (2) Sajeroning ngenterang kasukertan sakala niskala Bendesa misinggihang Pamangku Kahyangan Desa, sang rumaga Sulinggih miwah daging pamutus Sabha Desa Pakraman.

## Pawos 15

(1) Sajeroning midabdabin kasukertan desa, kamanggehang Sabha Desa Pakraman Peliatan.

(2) Palihan Sabha Desa Pakraman inggih punika:

ha. Pangayom

na. Paritula

ca. Manggala

ra. Pangliman

ka. Panyarikan

da. Patengen

ta. Angga Sabha Desa Pakraman

## Pawos 16

Sabha Desa Pakraman kasangga olih:

ha. Maka Pangayom : Kepala Desa Peliatan;

na. Maka Paritula : Panglisir Puri, Panglisir Griya miwah Sang Pecak madeg  
Bendesa Pakraman;

ca. Maka Manggala : Bendesa Pakraman;

ra. Maka Pangliman : Pangliman Bendesa Pakraman;

ka. Maka Panyarikan : Panyarikan Bendesa Pakraman;

da. Maka Patengen : Patengen Bendesa Pakraman.

ta. Maka Angga Sabha Desa Pakraman inggih punika:

1) Para Klian Kahyangan Tiga Desa Pakraman Peliatan

2) Para Klian Banjar sawewengkon Desa Peliatan

3) Klian Pakaseh Panyanggra Pura Gunung Sari

4) Para Klian Sekaa Teruna Banjar-banjar sawewengkon Desa Pakraman Peliatan

5) Sang Kamanggehang maka pamucuk Desa Peliatan

6) Sang Rumaga maka pamucuking Stri Desa Peliatan

7) Sang Kamanggehang maka pamucuk Pacalang Desa Pakraman Peliatan

8) Sang Kajudi Manut wiguna

### **Pawos 17**

Swadharmaning Sabha Desa Pakraman:

- ha. Maparidabdab ngulati kamanggehang awig-awig lan ngardi pararem
- na. Ngajegang Bendesa Pakraman, manur pararem
- ca. Maka Kertha Desa rikalaning wenten wicara

### **Pawos 18**

(1) Swadharmaning Bendesa Pakraman luwire:

- ha. Ngenterang, ngamargiang sadaging Awig-awig, pararem miwah pamutus Sabha Desa Pakraman;
- na. Nuntun tur ngenterang krama rauhing warga desa ngupadi karahajengan manut patitis;
- ca. Mawosin kalih niwakang pamutus marep ring wicara warga desa manut panepas Sabha Desa Pakraman;
- ra. Maka Duta Desa matemuang bawos ring sapa sira ugi.

(2) Prade Prajuru iwang ring panglaksana keni pamidanda nikel ring kaiwangan sowang-sowang krama, saha kangkat kararianang, manut pararem.

### **Pawos 19**

Patiyas utawi olih-olihan Prajuru Dewa luwire:

- ha. Polih leluputan, manut pararem;
- na. Polih Duman tanding tengah;
- ca. Patyas sewosan, manut pararem.

## **Pawos 20**

- (1) Prajuru Desa kagentosin riantukan:
  - ha. Seda;
  - na. Tutug panemaya;
  - ca. Kanorayang duaning iwang pamargi utawi nilar sesana;
  - ra. Wit saking pakayun rahayu utawi pinunas ngraga, manawi sangkaning sungkan-sungkanan.
- (2) Ngranorayang utawi ngentosin Prajuru patut sajeroning paruman Sabha Desa Pakraman.

## **Palet 3**

### **Indik Kukul**

## **Pawos 21**

- (1) Kukul ring Desa luwire:
  - ha. Kukul Desa/Kukul ring Kahyangan;
  - na. Kukul Banjar;
  - ca. Kukul Sekaa-sekaa.
- (2) Tabuh tetepakan Kukul Desa utawi Banjar:
  - ha. Banban:
    - 1) 3 (tigang) kelentungan : tengeran pawiwahan;
    - 2) 5 (limang) kelentungan : tengeran anak alit medal, embas;
    - 3) Atulud : tengeran wenten anak seda;
    - 4) 2 (duang) tulud : tengeran tedun ngayah, sangkep (paum)
    - 5) Tabuh tiga ngempang panjang : tengeran ngawangdeang karya.
  - na. Bulus
    - 1) Atulud : tengeran kageni bhaya;
    - 2) Duang tulud : tengeran artha bhaya, wiadin kapandangan;
    - 3) Tigang tulud : tengeran jiwa bhaya.
  - ca. Nung ting : tengeran yadnya, bulan kapangan miwah surya gra.

## **Pawos 22**

- (1) Kukul Desa utawi Banjar tan wenang katepak yening tan sangkaning pituduh Prajuru Desa/Banjar.
- (2) Sang nepak tan sangkaning pituduh patut digelis atur supeksa maka buatan panepake yan tan asapunika wenang sang mamurug kadanda, manut pararem.
- (3) Kukul Sekaa-sekaa samaliha kukul pondokan-pondokan tan kalugra nyawerin/matehin sukat/tengeran kukul Desa/Banjar, Prade mamurug taler kadanda manut pararem, sajawanin bhaya.

## **Palet 4**

### **Indik Paruman**

## **Pawos 23**

- (1) Sangkepan/Paruman Desa Pakraman wenten:
  - ha. Sangkepan Paruman Sabha Desa Pakraman, kawentenang nyabran awarsa, miwah padgata kala, manut pabuat;
  - na. Sangkepan/Paruman Prajuru Desa, kawentenang manut wiguna;
  - ca. Sangkepan/Paruman Banjar, kawentenang:
    - 1) Nyabran asasih, maka cihna tan paarah-arrah, duaning sampun tetep panamaya manut pararem sowang-sowang banjar, ring rahina Wrespati Umanis.
    - 2) Napkala/padgata kala, maka jalaran arah-arrah manut tetujon.
  - ra. Paruman sekaa-sekaa manut pabuat.
- (2) Paruman Desa utawi Banjar madudonan sakadi ring sor:
  - ha. Prasida lumaksana risampun ketedunin olih sang patut ngawiletin kamanggala antuk tengeran kukul miwah mabusana sima madya saha tan kalugra makta gegawan sakaluwire; tan maren ngarcana ring Ida Bhagawan Panyarikan maka sarana widhi widana cane;
  - na. Maka sarana janggi/dauh, pangawit kalaksanayang panyacak sepsepan saha riwusnya nyacak naur dedosan ageng alit manut pararem;
  - ca. Tan kalugra ngawetuang suara gora, utawi biota, yan mamurug keni pamidanda bea pacamil kadi dandaning uman-uman ring sabha, manut pararem;
  - ra. Pamutus bebawos briuk sapanggul (ingkup) punika kamanggehang.

- (3) Prade pidaging paruman tan kaingkupin mangda Prajuru Desa/Banjar ngilikang bebawos, saha pamutusnya mangda kararemin olih Krama Desa/Banjar bilih tan prasida kasungkemin jantos ping tiga, Prajuru wenang nunas bawos ring sang ngawawenang.

#### **Pawos 24**

- (1) Sajeroning paruman Sabha Desa Pakraman, Bendesa patut ngawedarang (nglimbakang) pamargin ngenterang desa, pamekas nganinin indik;  
ha. Munjuk lungsuring krama saha ayah-ayah, sulur artha brana druwen desa;  
na. Rerincikan Prajuru nganinin usaha desa kapungkur.
- (2) Pamutus paruman Shaba Desa Pakraman sinanggeh pararem maka pamitegep Awig-awig.

#### **Pawos 25**

- (1) Paruman Prajuru Desa kawenangang wantah ngrincikang usaha desa kapungkur;
- (2) Paruman Prajuru Desa tan kawenang ngawedalang tetegenan ring krama sadereng kaingkupin olih Sabha Desa Pakraman ring Paruman;
- (3) Pamutus paruman Prajuru Desa ngawetuang pasuwara, maka pidaging pituduh sang ngawawenang utawi ngonekang pecak pararem Sabha Desa Pakraman.

#### **Palet 5**

#### **Indik Druwen Desa**

#### **Pawos 26**

Padruwen Desa Pakraman Peliatan sakadi ring sor:

ha. Kahyangan Desa luwire:

- 1) Kahyangan Tiga : Pura Desa Gede Bale Agung, Pura Puseh, Pura Dalem Gede lan Prajapati Pura Ratu Sedahan Atma, Pura Dalem Puri lan Prajapati.
- 2) Pura Melanting
- 3) Pura Manca : Pura Gunung Sari, Pura Taman Sari, Pura Pucak Sari, Pura Tanjung Puri, Pura Ratu Bila (ratu Lingsir), Pura Batur.
- 4) Pura Panyungsungan : Pura Alas Arum, Pura Jati, Pura Dalem Alit, Pura Kepelan, Pura Ratu Ngurah, Palinggih/Panyungsungan ring sowang-sowang Banjar.

5) Pura Pamaksan : Pura Pasek Gelgel ring Banjar Ambengan, Pura Panataran Pande ring Banjar Pande, Pura Panataran Pragusti ring Tebesaya, Pura Pande ring Tebesaya, Pura Bayung ring Banjar Kalah, Mrajan Agung Puri Peliatan, Pura Pulasari ring Banjar Yangloni, Pura Panataran Satria Dalem Sagening ring Banjar Yangloni, Pura Panataran Gusti ring Padang Tegal.

na. Karang Desa, Karang Ayahan Desa

ca. Setra-setra luwire: Setra Dalem Gede Peliatan, Setra Pura Dalem Puri Peliatan

ra. Palaba Pura, carik/tegal manut ilikita: ring soang-soang pura

ka. Lelanguan, makadi tetabuhan lan ilen-ilen druwen Banjar lan sekaa: LPD, Balai Banjar.

da. Miwah padruwean seosan.

### **Pawos 27**

Piolih-olihan Desa Pakraman Peliatan luwire:

ha. Piolih-olihan saking palaba pura;

na. Urunan Krama Desa;

ca. Paica saking Guru Wisesa;

ra. Paica-paica sane tiosan, sane patut;

ka. Piolih-olihan saking LPD lan saking usaha Desa.

### **Pawos 28**

- (1) Prajuru wenang ngetangang pamupon laba Pura lan sapanunggilan padruweyan Desa;
- (2) Pikolih lan pamuponnya kaanggen prabeya piodalan saha wewangunan ring pura miwah kabuatan Desa Pakraman;
- (3) Nyabran sangkepan/paruman, Prajuru pangemong padruweyan ngawentenang atur indik munjuk lungsuring padruweyan ring krama;
- (4) Sakaluwiring padruweyan patut wenten ilikitanya
- (5) Tan kalugra ngadol, ngadeang makidhang utawi ngesahang padruwen Desa yan tan Kasungkemin olih Sabha Desa Pakraman ring paruman.

**Palet 6**  
**Indik Sukerta Pamitegep**  
**Kaping 1**  
**Karang Tegal lan Carik**  
**Pawos 29**

- (1) Krama Desa pangemong karang patut ngawatesin karang inucap antuk tembok utawi pagehan/turus, mangda pakandelannya asri.
- (2) Wates sisi kaler miwah kangin patut kakaryanin olih sang ngamong karang ayahan nucap, sane mawasta magaleng kaluan utawi manut pararem, sajawaning tanah pacatu, tegal, carik utawi tanah padruwen ngraga, sane kapiara watese magelang kateben manut dresta.
- (3) Prade karasayang pagehan/turus inucap nglikadin, yen pada arsa panyandinge, kengin watese nganggen pinget kewanten kasaksinin olih Prajuru Desa utawi pracihna patok saking sang ngawawenang.
- (4) Prade wenten karang kabebeng/embet mangda kautsahayang wenten pamarginnya utawi pangutangan toyannya, manut pararem.
- (5) Tan kengin:
  - ha. Ngentungang lulu, wengken wewalungan ka pakarangan/tetegalan anak lian, kalih ka margine utawi ka tukade.
  - na. Ngembahang toya wit saking bada wewalungan, jempeng pasiraman, pawaregan ka tegal, ka carik, ka margine, ka tukade miwah sane tiosan sane ngametuang ambu kawon.
  - Ca. Prade wenten sakadi ring ajeng keni pamidanda, manut pararem.

**Pawos 30**

- (1) Sinalih tunggil Krama Desa/Banjar tan kalugra:
  - ha. Ngalah-alah margi, tegal, karang Desa, Tukad lsp
  - na. Ngalah-alah tanah Kahyangan, Setra lan sakancan genah sinanggeh suci.
- (2) Prade wenten sakadi ring ajeng, sang ngalah-ngalah patut ngwaliang tanah inucap saha keni pamidanda, kadulurin upakara ring pangalah-alah tanah suci, manut pararem.

## **Kaping 2**

### **Pepayonan**

#### **Pawos 31**

- (1) Ngawit nandur pepayonan tanem tuwuh patut adepa agung (kalih meter) ngajeroang sakeng wates, prade kantos ngliwat wates, wenang kasepat gantungin.
- (2) Yening wenten tetanduran nglangkungin, samaliha mawastu mayanin ka pisaga, patut kawara antuk paiguman, ping ajeng prasida sang ndruwenang wit, ngarebah utawi notor.
- (3) Prade sampun kawara taler tan wenten usaha sang ndruwenang wit, sang rumasa katetehan/kajerihan wenang masadok ring Prajuru tur risampun kaparitatas, kalugra ngicalang wit inucap, sakewanten patin pepayonan patut katawur manut panglokika sane nepasin.
- (4) Sang keni pamidanda panyangaskara saha prabea manut pararem arep ring wewangunan sang karubuhan luwire:
  - ha. Sang ndruwenang wit sinanggeh mayanin, prade pungkut ngarubuhin wewangunan krama tiyos;
  - na. Sang notor, munggul utawi ngarebah taru tur ngarubuhin krama tiyos.
- (5) Prade wenten wit mentik sajeroning wates patut kapademang, mangda tan ngranayang wicara, prade sampun ageng kapademang, wit punika pinara tiga:
  - ha. Apah tiga katur ring sang ndruwenang;
  - na. Apah tiga katur ring sang panyandingnya;
  - ca. Apah tiga katur ring Desa Pakraman.
- (6) Krama Desa patut ngamanggehang kawredian tanem tuwuh ngawinang Desane asri.

## **Kaping 3**

### **Wewangunan**

#### **Pawos 32**

- (1) Nyabran ngwangun patut:
  - ha. Masadok ring prajuru, ping ajeng prade wewangunan ngeninin wates;
  - na. Ngangge sukat astabumi miwah gegulak asta kosala-kosali, sanistane manut ring patitis niskala.
  - ca. Tan nyayubin kapisaga.

- (2) Prade wewangunan jantos nyayubin bilih-bilih temboke ring telenging wates, risampun kawara tur kasadokang ring Prajuru, wenang kadanda manut pararem saha tembok inucap kagubar utawi sanistane mangda kakaryanang abangan.

#### **Kaping 4**

#### **Wewalungan**

#### **Pawos 33**

- (1) Sahanan warga Desa sane miara wewalungan patut sayaga nitenin negul/nglogor mangda tan ngarusak karang utawi pabianan krama siyos, bilih-bilih ngantos ngranjing ngletehin Kahyangan.
- (2) Prade wenten wewalungan malumbar utawi ngeleb ngrusak pakarangan utawi pabianan krama siyos, risampun kawara, dados kataban tur kadanda ngawaliang wit sane karusak saha nawur panebas papiaran tetaban, manut panglokikan prajuru.
- (3) Prade jantos ngletehin linggih suc, minakadi Pamrajan/Kahyangan, risampun kaparitas olih Prajuru wenang sang ndruwenang kadanda mrayascita manut sastra agama.
- (4) Krama Desa patut nyanggra wewalungan miwah sarwa prani, tan kapatut ngamademang paksi, nuba ulam miwah sane tiyosan, prade mamurug keni pamidanda manut pararem tur kaaturang ring sang ngawawenang.

#### **Kaping 5**

#### **Bhaya**

#### **Pawos 34**

- (1) Parindik bhaya, luwire: Jiwa Bhaya, Artha Bhaya (kapandangan) Duracara ring agama.
- (2) Sang manggihin kahanan Jiwa Bhaya, patut nepak kulkul bulus mapitulung manut pawos 21, (2), na.
- (3) Prade ring Desa kahanan Jiwa Bhaya, patut desane ngaturang Bhuta Yadnya tur sang mayanin katur ring sang ngawawenang.
- (4) Prade wenten jadma mamisuh utawi nguman-nguman jadma tiyos kakeninin pamidanda biya pacamil, manut pararem.

**CATURTAS SARGAH**  
**SUKERTA TATA AGAMA**

**Palet 1**

**Indik Dewa Yadnya**

**Pawos 37**

(1) Palinggih panyiwian sawewidangan Desa Pakraman Peliatan luwire:

ha. Kahyangan Tiga : Pura Desa Gede/Bale Agung, Pura Puseh, Pura Dalem Gede lan Pura Ratu Sedahan Atma, Pura Dalem Puri, Pura Prajapati.

na. Pura Melanting Pasar Peliatan.

ca. Pura Manca : Pura Gunung Sari, Pura Taman Sari, Pura Pucak Sari, Pura Tanjung Puri, Pura Ratu Bila (Ratu Lingsir), Pura Batur.

ra. Pura Panyungsungan : Pura Alas Arum, Pura Jati, Pura Dalem Alit, Pura Kepelan, Pura Ratu Ngurah, Palinggih/Panyungsungan Sowang-sowang Banjar, Ratu Lingsir Gria Belong.

ka. Pura Pamaksan : Pura Pasek Gelgel ring Banjar Ambengan, Pura Panataran Pande ring Banjar Pande, Pura Panataran Pragusti ring Tebesaya, Pura Pande ring Tebesaya, Pura Bayung ring Banjar Kalah, Mrajan Agung Puri Peliatan, Pura Panataran Satria Dalem Sagening ring Banjar Yangloni, Pura Panataran Gusti ring Padang Tegal.

(2) Rahina Piodalan ring sowang-sowang Kahyangan/Panyiwian inucap kamanggehang saking tetamian olih pamaksannya sowang-soawang sakadi ring sor:

ha. Kahyangan Tiga :

- |                                  |                                     |
|----------------------------------|-------------------------------------|
| 1) Pura Desa Gede                | : Rahina, Purnama Sasih Kapat       |
| 2) Pura Bale Agung               | : Rahina, Purnama Sasih Kadasa      |
| 3) Pura Puseh                    | : Rahina, Purnama Sasih Kapat       |
| 4) Pura Dalem Gede lan Prajapati | : Rahina, Anggara Kliwon Medangsiya |
| 5) Pura Ratu Sedahan Atma        | : Rahina, Buda Umanis Medangsiya    |
| 6) Pura Dalem Puri               | : Rahina, Anggara Kliwon Tambir     |

na. Pura Melanting : Rahina, Buda Wage Kelawu

ca. Pura Manca :

- 1) Pura Gunung Sari : Rahina, Anggara Kliwon Dukut
- 2) Pura Taman Sari : Rahina, Anggara Kliwon Prangbakat
- 3) Pura Pucak Sari : Rahina, Saniscara Kliwon Wayang
- 4) Pura Tanjung Puri : Rahina, Purnama Sasih Kapat
- 5) Pura Ratu Bila (Ratu Lingsir) : Rahina, Purnama Sasih Kapat
- 6) Pura Batur : Rahina, Purnama Sasih Kapat nemu Pasah

ra. Pura Panyungsungan :

- 1) Pura Alas Arum : Rahina, Anggara Kliwon Prangbakat
- 2) Pura Jati : Rahina, Purnama Sasih Kapat nemu Pasah
- 3) Pura Dalem Alit : Rahina, Anggara Kliwon Medangsiya
- 4) Pura Kepelan : Rahina, Anggara Kliwon Prangbakat
- 5) Pura Ratu Ngurah : Rahina, Saniscara Kliwon Uye
- 6) Ratu Lingsir Gria Belong : Rahina, Saniscara Kliwon Landep
- 7) Palinggih/Panyungsungan Sowang-sowang Banjar:
  - ha) Br. Teges Kawan Yangloni : Rahina, Purnama Sasih Kasa
  - na) Br. Kalah : Rahina, Saniscara Kliwon Wariga
  - ca) Br. Tengah : Rahina, Saniscara Umanis Watugunung
  - ra) Br. Teruna : Rahina, Saniscara Kliwon Wayang
  - ka) Br. Pande : Rahina, Purnama Sasih Katiga

ka. Pura Pamaksan :

- 1) Pura Pasek Gelgel ring Banjar Ambengan : Rahina, Purnama Sasih Kapat
- 2) Pura Panataran Pande ring Banjar Pande : Rahina, Purnama Sasih Kapat
- 3) Pura Panataran Pragusti ring Tebesaya : Rahina, Purnama Sasih Kapat
- 4) Pura Pande ring Tebesaya : Rahina, Anggara Kliwon Prangbakat
- 5) Pura Bayung ring Banjar Kalah : Rahina, Anggara Kliwon Prangbakat
- 6) Mrajan Agung Puri Peliatan : Rahina, Buda Kliwon Gumbreg
- 7) Pura Pulasari ring Banjar Yangloni : Rahina, Buda Umanis Prangbakat

8) Pura Panataran Satria Dalem Sagening

ring Banjar Yangloni

: Rahina, Buda Wage Klawu

9) Pura Panataran Gusti ring Padang Tegal

: Rahina, Purnama Sasih Kapat  
nemu Pasah

- (3) Pangaci ring Pura inucap manut kecap sastra agama, saha kalaksanayang nista, madya, utama manut kawentenan lan pararem pangempon sowang-sowang.
- (4) Pangempon sowang-sowang Pura inucap manut dresta kadi ring sor:
- ha. Pura Kahyangan Tiga kaempon olih Pangempon Krama Desa Pakraman Peliatan.
  - na. Pura Melanting Pasar Peliatan kaempon olih Desa Pakraman Peliatan.
  - ca. Pura Manca kaempon olih pangemponnya sowang-sowang
  - ra. Pura Panyusungam kaempon olih Panyungsung/Panyiwi sowang-sowang.
  - ka. Palinggih/Panyungsungan sowang-sowang Banjar kaempon olih sowang-sowang Banjar.
  - da. Pua Pamaksan kaempon olih sowang-sowang wargannyane.

### **Pawos 38**

- (1) Ring sowang-sowang Pura inucap patut kaadegang Pamangku:
- (2) Ngadegang Pamangku manut dudonan:
- ha. Turunan utawi terehan
  - na. Nyanjan utawi masemurang, sowang-sowang mapiteges mapinunas ring Pura/Kahyangan malarapan antuk nguntap Balian Konteng lan seosan pamangi.
  - ca. Kacatri (kajudi) olih krama sowang-sowang.
- (3) Tan wenang angga Pamangku luwire:
- ha. Ceda angge luwire: peceng, perot, cungh, lsp;
  - na. Sungkan ila, ayan, buduh, wiadin edan;
  - ca. Sane tan madruwe kasucian urip;
  - ra. Sang sapasira ugi sane tan kapatutang, manut pararem.
- (4) Prabea Kapamangkuan:
- ha. Prabeya ngadegang Pamangku kamedalin saha kalaksanayang olih sang ngadegang, makadi krama desa utawi pangempon pura sowang-sowang;

- na. Mapitra Yadnya riwekas patut kasangga olih krama desa utawi pangempon, sanistane antuk upakara Brahma Prayascita, panyanggrane manut pararem prade yadnya kalaksanayang oleh wargan sira/dane Pamangku;
- ca. Krama Desa/Kahyangan Tiga sane tan ngarep patut madana punia matempung, manut pararem.
- (5) Pamargine sekadi ring ajeng manggeh kamargiang yening Pamangku punika kantung ajeg ngamargiang swadharmanyanne.
- (6) Pamangku patut ngamanggehang sasananing Pamangku luwire:
- ha. Ambek Dharma sadhu;
- na. Asewaka Dharma, makadang satra utama;
- ca. Tan parek ring naya dustha;
- ra. Tan atayub ring tarub camara yudha;
- ka. Tan manjing ring umah wong banija krama;
- da. Tan manjing ring umah wong darati krama;
- ta. Ten wenang ajajuden;
- sa. Tan anginum asing angawe mada;
- wa. Tan pati pikul-pikulan;
- la. Tan salah suluh
- ma. Tan wenang anayub upadrawaning cor, yan mawiyawahara teka wenang adewa saksi;
- ga. Tan griganing wong akweh;
- ba. Tan keneng cuntakaning wong len, sajawanin kulawargannya tunggil natah, utawi pasiwannya manut dresta;
- nga. Tan wenang arabi wong balu, sapihan, stri larangan.
- (7) Prade mamurug, wenang pamangku nyepuhin raga kasaksinin olih Prajuru Desa/Pengempon sowang-sowang.
- (8) Yan pacang ngawalat rabi wenang ngaturang rumuhun pawintenannya, ring pura genahnya madeg pamangku nguni, tembenya wawu wenang ngawalat rabi, riwus upacaraannya wenang ngawana wasa salaminnya atahun, wus punika wawu mawinten lakibi kadi pawintenannya nguni.

### **Pawos 39**

Swadharmaning Pamangku luwire:

- ha. Ngenterang upacara piodalan ring Kahyangan utawi ring sowang-sowang pakubon krama;
- na. Prade salah sinunggil Pamangku kapialang utawi cuntaka, kengin nguntap Pamangku seosan utawi nuwur sang Sulinggih;
- ca. Samaliha yan sampun Pamangku ngayah ring pura, kancit wenten kulawargannya seda/padem Pamangku inucap tan keneng cuntaka, sakewanten Pamangku tan budal salami piodalan.

### **Pawos 40**

Patiyas utawi olih-olihan Pamangku luwire:

- ha. Pahtiga sarin canang ring Kahyangan miwah sarin canang ring sowang-sowang pakubon Krama Desa;
- na. Upon-upon carik miwah tegal, manut pararem;
- ca. Pamangku Kahyangan Tiga luput manuk;
- ra. Patiyas tiyosan manut pararem;
- ka. Prade Pamangku seda tan wenang pinendem.

### **Pawos 41**

- (1) Sang madeg Pamangku sewosan ring Pamangku Kahyangan Tiga luput rerampen ring desa.
- (2) Patiyas miwah leluputan sewos, manut pararem.

### **Pawos 42**

- (1) Pamangku kagentosin riantukan:
  - ha. Seda;
  - na. Pinunas ngraga sangkaning kageringan lsp;
  - ca. Kawusang olih krama sangkaning malaksana sane tan patut.
- (2) Prade Pamangku kawusang sangkaning malaksana tan patut kadanda, manut pararem saha ngawaliang prabea pawintenannya pecak.

### **Pawos 43**

Kasukertan Kahyangan kadi ring sor:

ha. Tan kalugra ngranjing ka pura luwire:

- 1) Sang katiban cuntaka;
- 2) Sahanan sane sinanggeh ngaletihin;
- 3) Sato agung sajawaning rikala mapepada;
- 4) Mabusana tan manut kadi tata caraning ngranjing ka pura;
- 5) Sadareng polih wak-wakan (pituduh) Prajuru Desa utawi Pamangku.

na. Pratingkahne tan wenang ring Pura:

- 1) Masumpah (cor), sajawaning wenten wak-wakan saking Prajuru Desa;
- 2) Makobetan, masesenengan, makolem dados asiki lanang wadon, mabacin, mawarih, mawihara/majengilan, nyangsang busana, menahin pasungan, macecepin rare;
- 3) Mungguh tedun ring palinggih sajawaning pituduh Prajuru utawi Pamangku.

ca. Sang mamurug kadi kecap ring ajeng, keni pamidanda pamrayascita agung-alit, manut pararem.

### **Pawos 44**

- (1) Yan wenten jadma karauhan ring Pura, kengin kapintonin prade rumasa kasumangsayan, yan tan wiakti jadma inucap kasisipang, manut pararem;
- (2) Prade kahyangan kahanan durmanggala, utawi keni bhaya, pamangku utawi sang manggihin patut digelis nyadokang ring Prajuru mangda marumang krama desa tur ngawentenang pamrayascita manut sastra agama.

### **Palet 2 Indik**

#### **Resi Yadnya**

### **Pawos 45**

- (1) Sang Pacang madeg Sulinggih, Pinandita makadi Balian konteng, Kubayan, Dalang patut masadok ring Prajuru Desa utawi Parisada Hindu Dharma Indonesia.
- (2) Prajuru Desa patut ngawas nitenin tur naweng ngalangin prade wenten kacihne sasar kakecap manut drestane, tur sareng nyaksinin upacarannya saha ngawedarang ring paruman Desa indik kawenangannya ngenterang yadnya;

- (3) Krama Desa patut ngaturang ayah sapamadeg miwah ring panglepas Sang Sulinggih riwekas katuntun olih Prajuru.

### **Pawos 46**

- (1) Sang Sulinggih patut ngutamayang muputang Yadnya ring wewidangan Desa Pakraman Peliatan, sesampune wawu muputang yadnya kajebar tior jagat utawi ka dura desa.
- (2) Krama Desa sami patut sareng ngawas nitenin katuntun olih Prajuru, mangda sahaning yadnya sane kawentenang polih pamuput Sulinggih utawi Pandita mangda nenten wenten pamargi nyumuka.

### **Palet 3**

#### **Indik Pitra Yadnya**

### **Pawos 47**

Pamargin Pitra Yadnya madudonan manut sakadi ring sor:

ha. Pangupakara sang kalayusekaran:

- 1) Antuk mendem utawi ngeseng, makacihna pakingsan ring ibu Pretiwi utawi ring Geni salami nuptupang prabeya, manut pararem.
- 2) Upacara atiwa-tiwa (pangabenan.palebun)
  - ha) Ngamasa, manut pararem;
  - na) Kadadak, manut pararem;
  - ca) Wates rahina, tan dados ngamargiang atiwa-atiwa ping kalih ring atunggilan banjar, manut pararem;
  - ra) Padewasan ngamasa mamargi sapisanan.
- 3) Upacara ngalungah nyarengin pamargin atiwa-tiwa (pangabenan/palebun)

na. Upacara Pitra Yadnya riwusan kaabenang kalanturang upacara munggah daun bingin (ngaroras).

ca. Sang ngamargiang pakingsan ring geni, awunnya patut kaanyut tur digelis kamargiang atiwa-tiwa (tan liwat sengker padewasan atiwa-tiwa ngamasa), manut pararem.

## Pawos 48

Swadharmaning lan Panyanggra prade wenten sinalih tunggil krama kalayusekaran:

ha. Sang katiben kaduhkitan patut:

- 1) Nyadokang ring Kelian Banjar tur nunas tetibang indik pamargi salantur ipun;
- 2) Nyanggra sapangrawuh Krama Banjar, manut pararem Banjar.

na. Swadharmaning Banjar:

- 1) Kelihan Banjar maritatas pamargi sang kaduhkitan, napike pacang kapendem, makingsan riin lantur kaabenang;
- 2) Prade kapendem, raris kasuarayang kulkul manut pawos 21 (2) ha, 3 olih Kelian Banjar utawi sane nyade;
- 3) Panyanggaran Banjar salanturnya:
  - ha) Sowang-sowang krama Banjar patut nabbing;
  - na) Ngrombo ngaryanin eteh-ete sawa saha kasarengin olih krama sane rauh nyambang;
  - ca) Sami Krama Banjar ngateh ka setra ngantos puput mapendem/pituduh Prajuru;
  - ra) Micayang tirta panembak banjar prade sang kalayusekaran kaabenang.

ca. Tan kengin nyekung/ngalejet langkungan ring 7 (pitung) rahina, sajawanin kaabenang, sasuwennya 22 rahina, tur patut polih pagebagan manut paetangan Kelian Banjar.

ra. Yan Sulinggih mantuk, manut pararem;

ka. Tan kalugra nginepang bangbang, miwah tan kalugra mendem (ngurugin) rikala: semut sadulur, kala gotongan, was panganten, prawani, purnama tilem, pasah, Coma Umanis Taulu, ingkel wong, kajeng kliwon, rerainan jagat, nagenaut, piodalan ring Kahyangan Tiga, ngawit pangalang sasih ngantos nyineb, sadereng liwat pagatuwakan (Buda Kliwon Pahang), miwah manut dresta Banjar Sowang-sowang.

da. Prade wenten kalayusekaran, rikala piodalan, rerainan jagat kengin mendem, pamargine nyilib, manut pararem Banjar.

## Pawos 49

(1) Sane kasinanggeh kacuntakan sakadi ring sor:

- ha. Cuntaka antuk kalayu sekaran;
- na. Cuntaka antuk ngrajaswala;
- ca. Cuntaka antuk ngembangsang putra;
- ra. Cuntaka antuk karuron;
- ka. Cuntaka antuk sungkan ila, buduh;
- da. Cuntaka antuk pawiwahan;
- ta. Cuntaka antuk gamiagamana;
- sa. Cuntaka antuk salah timpal;
- wa. Cuntaka antuk yening wenten anak istri mobot nenten kaupakarain pabiakaonan miwah pawidi widana;
- la. Cuntaka antuk mamitra ngalang;
- ma. Cuntaka antuk yening wenten anak istri ngembasang putra sadurung maupakara pabiakaon miwah pawidi widana;
- ga. Cuntaka antuk sad atatayi.

(2) Sengker cuntaka manut kawentenannya:

- ha. Cuntaka kalayu sekaran, cuntakanya kaanutang ring lokadresta Desa Pakaraman sowang-sowang;
- na. Cuntaka ngaraja swala, 3 rahina ngawit saking ngeraja swala utawi salaming ngeraja swala;
- ca. Cuntaka ngembas putra, 42 rahina (abulan pitung rahina) ngawit saking putrane embas, utawi ngantos sampun kaupakarayang makambuhan lan maprayascita manut sastra agama, lanang wiadin istri;
- ra. Cuntaka karuron, cuntakannya abulan pitung rahina (42 rahina) tur sampun matirta pamrayascita;
- ka. Cuntaka sakit ila, buduh/edan, cuntakanya manut ilikita pastika saking Sang Ngawawenang/sang nambanin miwah sampun mrayascita raga;
- da. Cuntaka pawiwahan, cuntakanya ngantos sesampune matirta pabiokaonan;

- ta. Cuntaka gamiagamana, cuntakanya ngantos sesampune kapalsang/kasapihang tur sampun kawentenang pamrayascita raga miwah pamrayascita Desa Pakraman/Kahyangan;
- sa. Cuntaka salah timpal kapuputang manut ring sastra Agama Hindu;
- wa. Cuntaka anak istri mobot nenten kawentenan upakara pabiakaonan, cuntakanya ngantos kawentenan upakara pabiakaonan;
- la. Cuntaka mamitra ngalang, cuntakanya ngantos kawentenang upakara pabiakaonan; ma. Ngembasang putra nenten kawentenang, upakara pabiakaonan miwah pawiwididana, cuntakanya ngantos wenten sane mameras sang putra, lan sampun kawentenan upakara manut ring sastra Agama Hindu;
- ga. Cuntaka Sad Atatayi, cuntakanya ngantos sampun maprayascita raga tur nenten pisan dados ngamungganghang upakara padwijatian.

(3) Cuntaka kalayusekaran:

ha. Kapendem cuntakanya:

- 1) Cuntaka/sebel banjar ngantos 3 rahina riwusnya mendem/manut dresta utawi sasampun polih pamrayascita;
- 2) Kulawargannya sajeroning pakarangan ngantos 42 rahina/manut dresta;
- 3) Kulawarga tiyos pakarangan 12 (roras) rahina utawi sesampune maprayascita.

na. Kaabenang cuntakanya:

Sane nyambut karya Pitra Yadnya cuntakanya ngawit saking nyambut padewasan karya, rawuh wusan mapegat kalanturang malih tigang rahina.

(4) Sane katiben cuntaka luwire:

ha. Kalayu sekarang sane kacuntakan:

- 1) Sang sane kalayu sekaran;
- 2) Kulawarganya;
- 3) Krama Banjar.

na. Ngeraja swala sane kacuntakan:

- Sang sane ngarajaswala.

ca. Ngembasang putra sane kacuntakan:

- Kulawarganya sane ngembasang putra lanang wiadin istri, manut pararem.

- ra. Pawiwahan sane kacuntakan:
- Sang sane ngalaksanayang pawiwahan lanang wiadin istri.
- ka. Sakit ila/buduh, sane kacuntakan raganya, ndewek.
- da. Karuron sane kacuntakan:
- Kulawarganya lanang wiadin istri.
- ta. Gamiagamana sane kacuntakan:
- 1) Sang sane ngalaksanayang gamiagamana;
  - 2) Desa Pakramannyane/kahyangan
- sa. Salah timpal sane kacuntakan:
- 1) Sang sane malaksana salah timpal;
  - 2) Kulawarganya;
  - 3) Desa Pakraman/Kahyangan.
- wa. Anak istri sane mobot nenten kawentenang upacara pabiakaonan sane kacuntakan:
- Sane maraga istri (sane mobot)
- la. Mamitra ngalang sane kacuntakan:
- Sane ngalaksanang mamitra ngalang
- ma. Ngembas putra nenten kawentenang upakara pabiakaonan miwah upakara pawidi-widana sane kacuntakan:
- 1) Sang sane ngembasang putra;
  - 2) Putra sane embas.
- ga. Sad Atatayi, sane kacuntakan:
- Sang malaksana Sad Atatayi
- (5) Tan keneng cuntaka kalayusekaran luwire:
- 1) Sang Sulinggih, Pamangku, lan Prajuru Desa;
  - 2) Rikala piodalan risampun ngalang sasih/ngalang tengah.

### **Pawos 50**

- (1) Upacara Atiwa-tiwa (pangabenan) kalaksanayang antuk:
  - ha. Sawa prateka, pangabenan mawatang sawa;
  - na. Sawa resi, pangabenan mawatang antuk sawa kresyan;
  - ca. Suwasta, pangabenan mawatang sawa sane tan kakeniang, kagentos antuk lalang utawi toya.
- (2) Panemayan pangabenan wenten kalih pawos:
  - ha. Ngaben dadakan/bah bangun manut pararem;
  - na. Ngaben ngamasa, manut pararem Banjar.
- (3) Dudonan pangabenan ngawit sakit ngwangun, ngagah (seda), ngeseng ngantos pangiriman miwah nganyut.

### **Pawos 51**

- (1) Pepatusan pangabenan wenten kalih pawos:
  - ha. Ngaben ngamasa, manut pararem Banjar;
  - na. Ngaben dadakan, pateh sekadi patus seda kapendem, manut pararem.
- (2) Peningune ring Krama Banjar ngawit ngayah manut abot-dangan kawentenan karya.

### **Palet 4**

#### **Indik Manusa Yadnya**

### **Pawos 52**

- (1) Manusa Yadnya inggih punika upacara-upacara dharmaning kahuripan manusa, ngawit sakeng patemoning kama bang kalawan kama petak sajeroning garbha ngantos kalayu sekaran riwekas.
- (2) Upacara ring ajeng madudonan sakadi ring sor:
  - ha. Magedong-gedongan duk pangerempinian ibiang;
  - na. Duk sang kamareka medal;
  - ca. Kepus odel;
  - ra. Roras rahina;
  - ka. Tutug Kambuhan (42 rahina);
  - da. Nigang sasihin (3 sasih)

- ta. Pawetuan/otonan/odalan (6 sasih);
  - sa. Tutug kelih (ngeraja swala wadone, ngembakin lanange);
  - wa. Matatah/mapandes;
  - la. Mawinten.
  - ma.
- (3) Upacara-upacara inucap nista, madya, utama manut sastra Agama Hindu lan dresta.

### **Palet 5**

#### **Indik Bhuta Yadnya**

#### **Pawos 53**

- (1) Bhuta Yadnya inggih punika upakara-upakara byakala ring Pratiwi lan Kahyangan, sarwa prani saha upacara-upacara ring babuthan miwah ring piranti sewosan.
- (2) Upacara pabyakala ring sarwa prani, sarwa tumuwuh muwang piranti luwire:
  - ha. Ring sarwa lelandep rikala Saniscara Kliwon wara Landep;
  - na. Ring sarwa tumuwuh lan piranti rikala Saniscara Kliwon wara Wariga;
  - ca. Ring sarwa syandana/wahana rikala Saniscara Kliwon wara Kuningan;
  - ra. Ring sarwa lelanguan rikala Saniscara Kliwon wara Krulut;
  - ka. Ring sarwa ingon-ingon/wewalungan rikala Saniscara Kliwon wara Uye;
  - da. Ring sarwa ringgit, ukir-ukiran rikala Saniscara Kliwon wara Wayang;
  - ta. Upacara pakala-kalan manusia manut widi-widiana, kabawos pabyakala.
- (3) Upacara pabyakala ring Pratiwi, Kahyangan lan Babuthan kawastanin macaru.
- (4) Pacaruan inucap ring ajeng nista, madia, utama, manut wiguna kadi ring sor:
  - ha. Ekasata;
  - na. Panca Sata;
  - ca. Panca Sanak;
  - ra. Resi Gana;
  - ka. Tawur Agung;
  - da. Panca Kelud.
- (5) Sajawaning kadi ring ajeng kawentenang upakara:
  - ha. Majot-jotan utawi yadnya sesa nyabran wusan ngarateng;
  - na. Masapuh-sapuh rikala pacang wali ring pura;

ra. Pacaruan pasasihan kalaksanayang nangken Tilem ngawit sasih ka 5, 6, 7, 8, lan ka 9, sajawanin wenten durbiksan jagat.

#### **Pawos 54**

- (1) Nangken ngawarsa rikalaning Tilem Kasanga kawentenang tawur kasanga, kalanturang antuk ngarupuk, makacihna pacang mapag rahina panyepian benjangne;
- (2) Brata panyepian sane kamargiang olih Krama Desa:  
ha. Amati geni, tan kengin maapi-api;  
na. Amati lelungan, tan kengin maoneng-onengan, masuwara gora, lsp;  
ca. Amati lelungan, tan dados malancaran.
- (3) Pabratan inucap kamargiang sakeng semeng ngantos semeng benjangne raris kasuwarayang kulkul pinaka cihna pangembak;
- (4) Sang mamurug kecap ring ajeng keni pamidanda manut pararem banjar sowang-sowang kamargiang olih patelik (pacalang Desa);
- (5) Riwus rahina Nyepi (benjangne) maka cihna pangawit Isaka Warsa patut warga Desa sami madharma Santi.

**PANCAMA SARGAH**  
**SUKERTA TATA PAWONGAN**

**Palet 1**

**Indik Pawiwahan**

**Pawos 55**

- (1) Pawiwahan inggih punika patemon purusa kalawan pradana malarapan panunggalan kayun suka lika kadulurin upasaki sakala niskala.
- (2) Pamargin pawiwahan luwire:
  - ha. Pepadikan, kamanggala antuk pakrunan;
  - na. Ngarorod, marangkat riyin wawu kakrunayang;
  - ca. Nyeburin utawi sentana nyeburin
- (3) Pidabdab sang pacang mawiwaha patut:
  - ha. Sampun munggah deha teruna (prasada nganutin Undang-undang);
  - na. Sangkaning pada lila (tan kapaksa);
  - ca. Nganutin kecap agama (tan gamia gamana);
  - ra. Kasudi wadhani prade pangambile tios agama;
  - ka. Kapati wangi manut dresta, antuk nunas tirta ring Bale Agung.
- (4) Pamargin pawiwahan mangda taler nganutin Undang-Undang Perkawinan sakeng sang ngawawenang.

**Pawos 56**

- (1) Pawiwahan sane kapatutang ring Desa sekadi ring sor:
  - ha. Sampun kamargiang pabeyakalan utawi pasakapan, kasaksiang sakala niskala olih Pandita utawi Pinandita;
  - na. Wenten pasaksi Prajuru sane mapakelingan utawi ngilikitayang pawiwahane;
  - ca. Sampun matengeran suaran kulkul Banjar;
  - ra. Pawiwahan inucap ring ajeng sampun kailikitayang ring sang ngawawenang;
  - ka. Dresta sajeroning pawiwahan patut kaajengan.
- (2) Parabian sane tan manut kadi kecap ring ajeng sinanggeh tan patut.

## Pawos 57

Tata caraning parabian patut sakadi ring sor:

ha. Sapa sira ugi sane pacang ngawarangang pakulawarganya patut masadok ring Prajuru, selanturnya Prajuru maritatas manut pamargin parabianne.

na. Pamargi papadikan manut dudonan:

1) Pakrunan jantos ring tiga, saha sowang-sowang malarapan:

ha) Kapartama antuk canang pangerawos lan canang sedah;

na) Kaping kalih antuk canang pangrawos;

ca) Kaping tiga antuk canang pangrawos, pamelin buat lan daksina pajati pamuput papadikan.

2) Risampun puput raris sang istri kaajak budal ring pakubon sang lanang saha kalanturang antuk pabiakala.

3) Mangda puput tumus sakala niskala, raris kulawargan purusa makta pajati ring sanggah/mrajan Pradana.

ca. Prade ngarorod/ngarangkat patut:

1) Reraman lanange digelis ngawentenang pangluku/majatiang antuk duta sakirang-kirangnya 2 (kalih) diri;

2) Pagenahan antene tan kengin ring pakubon sang lanang sadereng mabiakala.

ra. Sajeroning pakrunan/panglukuan patut:

1) Kamanggala antuk geng pangampura arep ring reraman pradanane;

2) Keigumang bawos idih pakidih utawi pagelan arep ring pasewekan sang ngidih saha dewasa pakrab-kambeyane riwekas;

3) Kacihnayang indik kapurusa utawi prade sentana rajeg kajejerang kapatut ngidih anak lanang sane kabawos pawiwahan nyeburin;

4) Prade tan katrima, pakrunan kamargiang ngantos ping tiga, pawiwahane raris kamargiang.

ka. Pakerab – kambeyan mapiteges upacara tinas apadang (puput) mapakuren manut sekadi ring sor:

1) Sajeroning kabawos ambe, kalaksananyang ring sakala niskala antuk sarana jejauman miwah pawidi widana:

ha. Jejauman pinaka ngambe/ngadungang kayun sowang-sowang pakulawargan pradanne;

na. Widi widana pinaka pajati niskala nunas pradanane ring sanggah/pamrajan.

2) Sajeroning bawos kerab, pamargi ring sakala:

ha. Antuk panyaksi Krama Banjar, kacihnayang antuk tengeran kulkul Banjar;

na. Pamekas panyaksi Prajuru sane ngilikitayang.

## **Palet 2**

### **Indik Nyepian**

#### **Pawos 58**

(1) Nyapian mapiteges palas marabian;

(2) Palas parabian sangkaning mawiwit wicara;

(3) Sang ayat palas marabian patut atur supeksa pailikitan riyin ring sang rumawos, wastu tinas apadang pamutuse kabawos nyapihin, wawu Prajuru nyobyahang kawentenannya ring desa saha ken i panebas swaran kulkul manu pararem.

#### **Pawos 59**

Tata cara palas parabian sakadi ring sor:

ha. Nawur prabea pasaksi sinalih tunggil sami matenga;

na. Pagunakayan polih pahan pada;

ca. pabekel, tatadan sowang-sowang kakuasa niri-niri miwah warisan kakuasa olih purusa;

ra. Ngaweruhin miwah ngupajiwain pratisentana manut swadharmaning guru rupak;

ka. Nawur pamidanda panebasan swaran kulkul manut pararem;

da. Mapamit ring sanggah/pamrajan purusane.

#### **Pawos 60**

Prade riwekas sang palas kacihna adung malih, patut:

ha. Ngelaksanayang pawiwahan malih;

na. Kadenda nikel saking palase, manut pararem.

### **Pawos 61**

- (1) Sang balu nyapian kabinayang dados:
  - ha. Balu luh wit sentana (sentana rajeg) miwah balu luh boya sentana rajeg;
  - na. Balu muani kapurusan (wit sentana) miwah balu muani nyeburin (boya sentana)
  
- (2) Swadharmaning balu luh utawi balu muani, kaceburin utawi nyeburin:
  - ha. Ngemanggehang patibrata tan kengin ngamargiang paradara/drati krama;
  - na. Ngusahayang waris, pagunakaya, tan dados ngadol, ngadeang, makidihang lan siosan punika, sajawaning polih uak-uakan sakeng pianak utawi kulawarga pinih tampek sakeng kurenannya prade pianak kantun alit-alit.
  - ca. Kengin ngidih sentana prade wenten pidabdab sadurung sinalih tunggil padem, saha polih uwak-uwakan saking kulawarga sinanggeh purusa;
  - ra. Kawenangang mawiwaha malih, prade wenten uak-uakan manut angka (2) aksara na ring ajeng.

### **Pawos 62**

- Balu luh lan balu muani, kaceburin utawi nyeburin kaucap tan pageh sekadi ring sor:
- ha. Drati krama utawi paradara;
  - na. Matilar sakeng pakubon tan pasadok jantos 6 (nem) sasih;
  - ca. Lempas ring swadharma sewos-sewosan, tan prasida ngesehin solah maprawerti arep ring pituduh kulawarga purusa sane patut.

### **Palet 3**

#### **Indik Sentana**

### **Pawos 63**

- (1) Sentana wenten kalih pawos, sane kaucap pratisentana miwah sentana peperasan;
- (2) Pratisentana inggih punika sentana sane metu saking pawiwahane kapatut;
- (3) Prade pawiwahane tan kapatut ngawetuang sentana, mangda tan kantun kabawos babinjat utawi astra patut kamanggala antuk panyangaskara peperasan;
- (4) Prade pawiwahane tan ngemetuang sentana kengin ngedih sentana antuk upasaksi sakal niskala sane kawastanin sentana peperasan;

- (5) Sentana rajeg inggih punika, pratisentana wadon (Pradana) sane kamanggehang lanang (Purusa) tur risampun ngalaksanayang pawiwahan kaceburin;
- (6) Sang sane dados kaarsayang sentana rajeg inucap inggih punika:
  - ha. Pratisentana wadon, tunggal;
  - na. Sampun kamanggehang dados pratisentana lanang (purusa);
  - ca. Kapawiwahan kaceburin, kautamayang olih jadma sane magama Hindu utawi jadma sane magama sewosan sane sampun ngalaksanayang sudi wadhani;
  - ra. Sane ngamanggehang sentana rajeg patut masadok ring Prajuru Banjar, tur Klian Banjar patut ngawedarang ring Banjar saha ngaturang ring Prajuru Desa Pakraman.

#### **Pawos 64**

- (1) Meras sentana manut dudonan patut saha upacara pamerasan sane kasaksiang sekalaniskala;
- (2) Sapa sira ugi Krama pacang ngedih sentana patut masadok ring Bendesa, Klian Banjar sanistane nem sasih sadereng pamerasan, Bendesa/Klian Banjar nglanturang pakarsa punika ring sang ngawawenang;
- (3) Bendesa kasade olih Klian-klian Banjar ngawedarang ring sawidangan Desa, sang sapa sira ugi rumusa tan lila mangda nyadokang masengker kalih wuku sabanen pamerasan ring Bendesa Pakraman/Klian Banjar;
- (4) Prajuru Desa digelis mawosan saha ngicenin pamutus nepek ring catur dresta miwah pararem;
- (5) Prade sulur paperasan tan manut kadi kecap ring ajeng, Prajuru Desa wenang ngandeng sang pacang makarya, saha ngicenin panuntun, mangda kapuputang riyin bebawos sulur utawi wicaranya.

#### **Pawos 65**

- (1) Paperasan sane kapatut ring Desa risampun makacihna:
  - ha. Widi widana pamerasan;
  - na. Kesaksian olih Prajuru Desa sane makelingang utawi ngilikitayang;
  - ca. Kasobyahang ring wewidangan desane.
- (2) Sane kapatut peras angge sentana kadi ring sor:

- ha. Jadma magama Hindu;
  - na. Pepernahan nedunag saking sang meras;
  - ca. Kulawarga saking purusa, prade tan wenten kengin sakeng wadon yaning taler tan wenten, wawu kengin sakama-kama (saking kayun);
  - ra. Kautamayang saking waris pancer kapurusa;
  - ka. Sinalih tunggil mawiwit saking kulawarga tunggal sanggah utawi mrajan paibon lan dadia utawi ngambil anak tios sakewanten sane magama Hindu.
- (3) Kengin meras sentana langkung ring adiri, lanang wiadin wadon, nanging lanang wadon tan dados kapawiwahang.

#### **Palet 4**

#### **Indik Warisan**

#### **Pawos 66**

- (1) Warisan inggih punika tetamian arta brana, utang saha ayah-ayah ngupadi sukerta saginan sakala niskala saking kelurahannya arep ring sentananya;
- (2) Sane sinanggeh warisan luwire:
  - ha. Duwe tengah, makadi karang ayahan Desa, Kahyangan, Pusaka, lsp;
  - na. Pamrajan/sanggah;
  - ca. Paganakayan, tatadan/jiwa dana, hutang piutang.
- (3) Wawu kengin kabawos warisan prade wenten:
  - ha. Sang mapiturun (pawaris);
  - ca. Keturunan/pamucuk waris (ahli waris);
  - ra. Arta brana miwah tetegenan maka cihna warisan.

#### **Pawos 67**

- (1) Pamucuk waris (ahli waris)
  - ha. Pratisentana purusa;
  - na. Pratisentana predana (sentana rajeg);
  - ca. Sentana peperasan lanang/wadon.
- (2) Prade tan wenten sakadi ring ajeng, sane sinanggeh pamucuk waris (ahli waris):

- ha. Turunan purusa pernah ngunggahang, rerama lanang, pekak, selantur ipun semeton sodet (misan, mindon, lsp)
- na. Turunan purusa pernah kasamping makadi kaponakan di misan miwah di mindon.

### **Pawos 68**

Swadharmaning pamucuk waris (ahli waris) patut:

- ha. Nerima saha nguasayang tetamian pahan saking kaluhurannya, makadi ngempon sanggah, pura, saha pangupakarannya miwah nyelidihi tetegenan pawaris;
- na. Ngabenang pewaris saha ngalanturang upacara-upacara Pitra Yadnya;
- ca. Nawurin hutang-hutang pewaris sane manut panglokika.

### **Pawos 69**

Pangepahan waris manut sakadi ring sor:

- ha. Risampun kalaksanayang Pitra Yadnya lan hutang-hutang pewaris buntas katawur.
- na. Para pamucuk waris polih pahan pada sangkaning pagunakayan, sajabaning duwe tengah kaamong olih pamucuk waris sane sinanggeh krama ngarep.
- ca. Sinalih tunggil pamucuk waris kengin tan polih pahan prade:
  - 1) Nilar kawitan lan sasana ring agama;
  - 2) Alpaka guru rupaka;
  - 3) Sentana rajeg kesah mawiwaha utawi pratisentana nyeburin, sowang-sowang kabawos ninggal kadaton.
- ra. Boya pamucuk waris kengin polih upon-upon manut dudonan, luwire:
  - 1) Sentana luh, salami dereng kesah mawiwaha utawi tan alpaka guru rupaka miwah prade madrebe pianak tan kaangkenin olih reraman rare inucap, kengin ngawaris wantah pikolih (pagunakayan) sentana luh inucap kemawon;
  - 2) Balu luh wiadin muani nyeburin;
  - 3) Mulih deha utawi teruna, riantukan ring pawiwahane pecak sampun kabawos ninggal kadaton.
- ka. Pewaris kengin maweweh rikala maurip pinaka jiwa dana, tatadan/bekel maka cihna paweweh tetp ring piangk sane kesah mawiwaha.

## Pawos 70

- (1) Prade sajeroning pakulawarga wenten pamucuk waris langkungan ring adiri, patut:
  - ha. Kawentenang paigum indik padum waris inucap;
  - na. Yen tan prasida, katunasang tetimbang ring Prajuru Desa (Kertha Desa);
  - ca. Prade taler tan wenten cumpu ring panepas Kertha Desa, kengin ketumusang ring sang rumawos.
- (2) Prade wenten karang kaputungan, patut Prajuru Desa nibakang ring:
  - ha. Sang sinanggeh pamucuk waris manut pawos 67;
  - na. Sang kengin anggen sentana manut pawos 65 (2) miwah (3);
  - ca. Prade taler tan wenten, Prajuru Desa patut ngicenin panepas.
- (3) Prade jantos karang Desa kepah utawi kasepih, patut sowang-sowang tedun makrama desa ngarep.

**SAT SARGAH**  
**WICARA LAN PAMIDANDA**

**Palet 1**

**Indik Wicara**

**Pawos 71**

- (1) Sane wenang mawosin makadi mutusang wicara ring desa inggih punika Sabha Desa pakraman sinanggeh maka Kertha Desa.
- (2) Tata dudonan mawosan saha muputang wicara Krama Desa kadi ring sor:
  - ha. Kaping ajeng kabawosan olih Kelian Banjar;
  - na. Tan cumpu ring panepas Klian Banjar, karerehang pamutus ring paruman Banjar;
  - ca. Prade tan cumpu ring pamutus paruman Banjar, katumusang ring Bendesa Pakraman;
  - ra. Taler tan cumpu ring pamutus Bendesa Pakraman, katunasang ring paruman Sabha Desa.
- (3) Prade sang mawicara tan cumpu ring pamutus Sabha Desa, kengin nunasang wicara inucap ring sang rumawos.

**Pawos 72**

- (1) Sahanan wicara mawiwit kacorahan lan sakaluwire sinanggeh nungkasin daging awig-awig pasuara miwah pararem Desa/Banjar, Prajuru patut digelis mawosan tan nyantos pasadok;
- (2) Sajaba wicara kadi ring ajeng, patut nyantosang pasadok sang nunas bawos;
- (3) Panepase patut pastika nyantenang iwang patut malarapan Tri Pramana (Saksi, Ilikita, Bukti), miwah tan maren nepek ring catur dresta.

**Palet 2**

**Indik Pamidanda**

**Pawos 73**

- (1) Desa/Banjar wenang niwakang pamidanda ring warga Desa sane sisip.
- (2) Paniwak inucap kalaksanayang oleh Bendesa/Klian Banjar.
- (3) Bacakan pamidanda kasisipan luwire:
  - ha. Ayahan panukun kasisipan;
  - na. Denda arta;

- ca. Kadaut karang ayahannya;
  - ra. Kanorayang;
  - ka. Panyangaskara.
- (4) Pamidanda sane katiwakang patut masor-singgih manut ring kasisipane.
  - (5) Jinah utawi arta brana pamidanda ngranjing dados druwen Desa/Banjar.

#### **Pawos 74**

- (1) Krama sane langkung ring tigang paruman ngalantur tan nawur urunan miwah dedandan wenang karampag manut pararem.
- (2) Rerampagan ngangge tata cara kadi ring sor:
  - ha. Kalaksananyang olih Prajuru kasarengin olih Krama tigang diri maka saksi;
  - na. Sang ngarampag sangkaning darsana ngambil barang utawi nyawenin tanem tuwuh, akehnya manut ring hutang sang karampag, sang karampag mangda lila nyukserahang barangnya sane dados wala;
  - ca. Prajuru miteketang mangda barang-barang inucap sane karampag digelis katebus, masengker awuku ring kutus rahinane pacang kaadol;
  - ra. Tan nganinin saluwir barang sane patut inggilang manut agama miwah mademang pangupa jiwa sang karampag.

#### **Pawos 75**

- (1) Prade sang pacang karampag ngawara (ngalangin) pamargi inucap, mawastu sampun tan nganutin awig-awig, Krama punika wenang kanorayang.
- (2) Semaliha yen purun taler ngalangin palaksana kadi ring ajeng tan wenten pamargi sajawaning kadaut karang ayahannya.
- (3) Pamidanda inucap ring ajeng prasida buntas risampun sang kakaninin:
  - ha. Nunas geng pangampura ring Krama Desa riantukan nguak pasubaya (pararem) pecak;
  - na. Nawur pangargan panguak pasubayane duk pacang karampag kadulurin prayascita panyapsap kaiwanganne ring Desa.

**SAPTAMA SARGAH**  
**NGUWAH-NGUWUHIN AWIG-AWIG**

**Pawos 76**

- (1) Nguwah-nguwuhin Awig-awig Desa puniki kalaksanayang olih paruman Sabha Desa Pakraman.
- (2) Awig-awig puniki kamargiang ngawit kaingkupin (kararemin).

**Pawos 77**

- (1) Sakaluring sane wenten saderengnya patut kaanutang ring sadaging Awig-awig puniki.
- (2) Sakaluring sane durung kabawos sajeroning Awig-awig puniki patut kalaksanayang manut tata cara sane sampun mamargi kadulurin antuk pararem-pararem.

**Pawos 78**

- (1) Awig-awig puniki kararemin duk: Rahina Anggara Umanis Wara Uye, Purnaming sasih Kapitu, Isaka warsa 1916, tanggal Masehi 17 Januari 1995.
- (2) Awig-awig puniki kauwah-uwuhin duk: Rahina Redite Umanis Merakih tanggal 9 Juni 2002.
- (3) Awig-awig puniki kalingga tanganin olih Prajuru Desa Pakraman Peliatan, kasarengin Prajuru Dinas Pinaka Saksi.
- (4) Luwir sang ngalingga tanganin:  
ha. PRAJURU DESA PAKRAMAN PELIATAN  
na. PRAJURU DINAS PINAKA SAKSI

PRAJATI DESA PAKRAMAN PELIATAN  
Desa Pakraman



IDA BAGUS SUGATA

2. Panyarikan

Drs. TJOK WISNU WARDANA

3. Kelián Br. Yangloni


I NYOMAN SUPARTA

4. Kelián Br. Tegeskawan



I TUT KARMA

5. Kelián Br. Kalah



I MADE SUADHI

6. Kelián Br. Tengah Kangin



ANAK AUNG GEĐE NGURAH

7. Kelián Br. Tengah Kauh



I MADE RAWI

8. Kelián Br. Teruna



I MADE ARTA RIMBA WÁ

9. Kelián Br. Pande



PANDE WAYAN DOLIK

10. Kelián Br. Ambengan



Drs. I WAYAN CAMENG

11. Kelián Br. Tebasaya




I MADE BAWA

12. Kelián Br. Taiman Kelod



I GUSTI NYOMAN ARYA

13. Kelián Br. Padang Tegal Tengah



IDA BAGUS POSIA

na PRAJURU DINAS PINAKA SAKSI

1. Kepala Dusun Yangloni

I NYOMAN SUPARTA

3. Kepala Dusun Kalah

I MADE SUADHI

5. Kepala Dusun Tengah Kauh

I MADE RAWI

7. Kepala Dusun Pande

I MADE WYAN DOLIK

9. Kepala Dusun Tebasaya

I MADE BAWA

2. Kepala Dusun Tegeskawan

I KETUT KARMA

4. Kepala Dusun Tengah Kangin

ANAKI GUNO GEDE NGURAH

6. Kepala Dusun Teruna

I MADE ANITA RIMBAWA

8. Kepala Dusun Ambengan

I MADE WAN CAMENG

Camat Ubud

Drs. IDA BAGUS NGURAH GEDE  
NIP. 010 077 462

Mengetahui dan telah dicatitkan

21 Oktober 2000  
27 Tahun 2000



BUPATI GIANYAR

I JOKORDA GDE BUDI SURYAWAN, SH.